

Des Türckischen Keyfers abgefanten

Feindes Brieff/so er den Legaten/dem Römischen teutschen jes regieren,
den Keyser Rudolpho dem andern dises Namens/vnserm aller

Gnädigsten Herrn/in disem I 5 7 9. Jar
hat zugeschickt.

S On des Großbittenden Gottes im Himmel/ Wir Amurath ein
Gott auff Erden/der grosse vnd Allmächtige Keyser/ ein vnüberwindlicher vnd
regierender König/aller Könige auff Erden/ von Auffgang bis zum Niedergang/
Keyser vnd Soldan zu Babilon/vnd Herzog des Edlen Stammes in Medien vnd
Armenia/ Ein geborner Fürst/ vnd Herr des Dornkronbaums/ bis auff den Berg
Asia/ Ein Großhelffer/ der beyder Götter/ Mahomers vnd Lunian/ Victor vnd Triumphator
in Hierusalem, Ein Herr Hüter vnd Besizer des Grabes/ des gecreuzigten Gottes/ ein zer-
störer vnd ewiger abgefagter Feind/ der ganzen Christenheit/ vnd allen denen/ die sich Christē
nennen/ 2c. **E**nebieten dir Keyser ein geringer König in Behemen vnd Ungern/ dir vñ
allen deinen Fürsten vnd Herren/ auch Bundsgenossen/ Papsst vnd Cardinālen/ Bischoffen/
vnd deinen gebornen/ bey verlierung vnserer Kronen/ Königreich/ vnd enterbung deines gan-
zen Landes/ vnd thū dir zu wissen/ dz Wir dich mit Dreytzechen Königreich volck/ etlich Hun-
dert tausent starck/ zu Rossz vñnd zu Fuß/ mit Türcken vnd Türckischer Rüstung/ Ja mit al-
ler vnserer Churfürsten macht/ als Du vnd die deinen nie kein mahl gesehen/ gehört/ vnd erfah-
ren/ für Wien deine Hauptstat/ vnd alle darinne fürnemlich in Hauß vñ Hof suchen wöllen/
Dich vnd deine helffer vnd alle angehengte Parten/ mit vnser gewalt vnd Kriegesrüstung/ dich
brennen/ Rauben vnd Wöden/ vnd des aller elendesten Todes/ so wir mögen vnd können er-
dencken/ vmbbringen/ vnd deine gefangene Christen/ Die schwangern Weibern/ wie die Hund-
sampesten Jungen/ in Mutterleib tödten vnd vmbbringen lassen/ Dir vnd deinen Christliche
Glauben zu spot vnd trutz/ Denn wir vns gantzlich fürgesetzt haben/ Dich Keyser/ der du im
Reichsten Lande sitzest/ dir deine Königreich mit dem Schwert vnd Heereskrafft abzudrin-
gen/ vnd auch den Schlüssel vnd Stuel zu Rom/ mit dem Guldenen Scepter vndertruckten
vnd zerstören/ vnd wöllen sehen/ Ob dir dein gecreuzigter Ihesus wirdt helfen/ Denn du vñnd
die deinen sorgen/ Er lebe/ Denn wie es deine Legaten hat geholffen/ in vnsern glauben/ so solt
dich auch helfen/ Den wir nicht glauben wollen/ noch solche vngreifliche ding hören mögen/ das
der solte helfen/ dem wir auch sein Land vnd eigenthumb seiner Geburtschafft vor etliche Hun-
dert Jaren/ in vnser Regierung gehabt haben.

Solches haben wir dir wollen anzeigen/ damit du Landes armer/ mit allem deinem an-
hang wissest nach zurichten/ vnd täglich alle stunden solchs vermügen/ nun in der warheit er-
fahren/ vnd mit der that befinden. Datum in vnser gewaltigen vesten Stat/ Constantino-

pel/ Welche vnser Voreltern den deinen mit Heereskrafft abgedrungen/ darauff Weib vnd
Kind ins elend getrieben nach vnserm willen/ bis anhr end solche zu spot vnd hon be-
halten/ Nach vnser Geburt im 27. Jahr/ vnd sezigiger gewaltiger Regie-
rung im 7. Jar.



Univ. Bibl.
München